

左  
通  
補  
釋

補釋十一

起宣公元年  
盡十一年

左通一

錢塘梁履繩學

宣元

三月遂以夫人婦姜至自齊

顧湄咫聞錄曰古者居父母喪而昏娶見於經傳者唯魯宣公一人所謂不待貶絕而罪惡見也其他禮記所載通典所議咸以期功之喪尚爲非禮唐韋彤裴堪爭張茂宗昏娶辭嚴義正

見舊唐書張茂宗本傳

宋時民庶之家祖父母父母

老疾無人侍奉子孫居喪聽尊長自陳驗實方許昏娶亦未有居然冒喪易吉而昏娶者今人反以送死爲緩唯以借親爲急父母死未卽入棺乃禁家人舉哀棄親喪之禮而講合蓋之儀此異類所不忍爲而世俗樂爲之雖衣冠

之族間亦有之不以爲非何哉讀禮通考百十四

先辛

穀宣十二年見子辛春秋分記世譜二

曾于平州解齊地在泰山牟縣西晉志作東牟縣

今山東萊蕪縣西有平州城案縣屬泰安府日講春秋解義二十七

遇于北林解滎陽中牟縣西南有林亭在鄭北

服虔曰北林鄭南地也京相璠曰今滎陽苑陵縣有故林

鄉在新鄭北故曰北林也余案林鄉故城在新鄭東北如

北七十許里苑陵故城在東南五十許里不得在新鄭北

也考京服之說竝爲疏矣杜預云滎陽中牟縣西南有林

亭在鄭北今是亭南去新鄭縣故城四十許里蓋以南有

林鄉亭故杜預據是爲北林最爲密矣

水經渠水注

北林在河

南開封府中牟縣西南

春秋輿圖

秦急崇解崇秦之與國

僖二十四年杜注鄠國在始平鄠縣東案此卽文王所宅之鄠邑也本崇國文王克崇而都之故詩曰旣伐于崇作邑于豐武王旣遷鎬京乃封其弟于此竹書成王十九年

黜豐侯蓋國除久矣春秋之崇蓋復居鄠而襲崇之舊號

者

春秋地名攷略十四

鄠國在陝西西安府鄠縣東五里卽西周之

豐邑後又爲崇國

春秋輿圖

案通志氏族略二云崇地在鄠

縣東鄠故城在縣北三十里故扈城在縣北二十里蓋夏爲扈商爲崇周爲鄠亦爲崇雖竝居鄠縣遷移不一謹據

一統志云鄆縣故城在今鄆縣治北則鄆在今縣之東爾城郭變易是資目驗方能究昭已

驟諫而不入

驟諫服虔云數也

詩將仲子釋文

二宣戰于大棘解大棘在陳畱襄邑縣南

今河南歸德府睢州西曲棘里有棘城又寧陵縣西南七里有大棘城亦與睢相近水經注云後其地爲楚莊所并

故大棘有楚太子建墳伍員釣臺

大事表七之二

狂狡輅鄭人鄭人入于井倒戟而出之獲狂狡君子曰失禮違命宜其爲禽也戎昭果毅以聽之之謂禮殺敵爲果致果爲毅易之戮也

何休以爲狂狡近於古道鄭箴膏肓云狂狡臨敵拘於小

仁忘在軍之禮譏之義合於識詩大明正義倒戟猶倒戈也坐

此遲緩反爲鄭人所獲邵氏左傳大戴禮論四代之政刑云祭

祀昭有神明燕食昭有慈愛宗廟之事昭有義率禮朝廷

昭有五官無廢甲冑之戒昭果毅以聽戎當作戎然則戎爲句

昭果毅以聽古語也下四句乃左氏益之耳惠氏補注二

今日之事

今日之事御事也呂氏春秋察微篇注

乘甲則那解那猶何也

乘甲則那那猶今人云那那也爾雅釋詁注

遂自陰地解陰地晉河南山北自上洛以東至陸渾

哀四年蠻子赤奔晉陰地卽此晉上雒今陝西商州雒南  
縣陸渾今河南府嵩縣其地南阻終南北臨大河所謂河  
南山北也又陝州盧氏縣有陰地城卽命大夫屯戍之所  
猶夫南陽爲河內之總名而別有南陽城則在修武也大事表七之三

從臺上彈人而觀其辟丸也

從高臺上引彈觀其走而避丸以爲樂也

呂氏春秋過理篇注

宰夫

天子有宰夫兼有膳夫

竝見周禮天官膳夫見莊十九年傳

掌君飲食諸侯

亦有宰夫

又見宣四

復有膳宰

昭九

掌君飲食與天子膳夫同案

公食大夫云凡宰夫之具饌于東房不使膳宰者彼食異

國之大夫敬之故使宰夫具饌此燕已臣子故使膳宰卑者具饌必知膳宰卑於宰夫者案天子宰夫下大夫膳夫上士天子膳夫卑於宰夫則知諸侯膳宰亦卑於宰夫者

也饌禮燕禮疏

賓諸畜解畜以草索爲之筓屬

畜草器若今市所量穀者是也齊人謂之鍾

公羊宣六年傳注

使婦人載以過朝正義過朝以示人令衆懼已

令婦人載而過朝以示威

呂氏春秋過理篇

及潤釋文屋雷也正義謂簷下水潤之處

月令曰其祀中雷先儒曰中雷猶中室也古者複穴是以

名室爲中雷然禮有東雷

燕禮設篚當東雷云言東雷明亦有西雷

案疏有門



內雷

燕禮賓執肺以授鍾人於門內有重雷檀弓會子弔於季氏涉內雷重雷

非屋雷也

鄭氏注云堂有承雷以木為之用行水亦宮之飾也孔穎達曰天子則四注四面為重雷諸侯

四注重雷則差降去後餘三大夫唯餘前後二士則唯一在前禮書四十五

公患之使鉏麇賊之解鉏麇晉力士

患疾也賊殺也

國語晉語五注

有一於此

不忠不信若行之必有其一也

呂氏春秋過理篇注

觸槐而死解槐趙盾庭樹

觸畜也

呂氏春秋過理篇注案畢氏沅校曰畜疑掩字之誤

槐古者朝位樹之私

家之朝皆植焉晉鉏麇觸趙宣子庭之槐董叔紡於范氏

庭之槐

晉語又齊景公有所愛槐使人守之晏子皆植於庭春秋

之驗也

羅願爾雅翼十一

公嗾夫獒焉釋文嗾說文云使犬也

獎使之進也

說文嗾字繫傳

宣子田於首山解首山在河東蒲坂縣東南

雷首山在今蒲州南山西蒲州府一名首陽山詩唐風首陽之

巔論語伯夷叔齊餓于首陽之下馬融曰首陽山在蒲坂

河曲之中

案又見郡國志注

寰宇記云首陽即雷首之南阜也或

稱首山

案呂氏春秋有始覽注首山在蒲坂之南河曲之中伯夷所隱又見淮南繆稱訓

漢地理

志蒲反有首山祠祀志黃帝采首山銅即此亦稱獨頭

山閼駟曰首陽山一名獨頭山夷齊所隱也

案見水經河水四注又

名襄山穆天子傳云東巡自河首襄山又名薄山穆天子

傳云登薄山寘軫之陞史記封禪書云薄山者襄山也又名堯山漢地理志蒲反有堯山水經注云雷首山臨大河北去蒲坂三十里俗亦謂之堯山也又名中條山元和志云雷首一名中條在河東縣南十五里永樂縣北三十里寰宇記云中條山在芮城縣北十五里亦曰薄山也又名隔山寰宇記云堯山在河東縣南二十八里卽雷首山山有九名亦卽隔山湯伐桀升自隔注在河曲之南卽此也書湯誓序括地志云此山西起雷首東至吳坂長數百里隨地異名通典云雷首在今河東縣此山凡有八名歷山首陽山薄山襄山甘棗山中條山渠豬山獨頭山也禹貢錫指十一上

宦三年矣解宦學也

服虔云宦學也是學職事爲官也禮記曲禮上正義案

世家集解服虔曰宦官學士也疑有脫誤

問其名居解問所居

問其名及所居也林氏句解

趙穿攻靈公於桃園

桃園園名國語晉語五注

宣子曰嗚呼我之懷矣自詒伊戚其我之謂矣解逸詩也

此云自詒伊阻小明云心之憂矣宣子所引竝與此不同

者杜預云逸詩也故文與此異詩雄雉正義別見駁證

爲法受惡解善其爲法受屈

服虔曰聞義則服史記晉世家集解案惠氏補注云聞義則服弟子職文也

宣子使趙穿逆公子黑臀于周而立之

於此見盾與穿志同逆新君不使他人而使穿欲免穿於

討也

趙氏補注五

詛無畜羣公子

羣公子獻公之庶孽及先君之支庶也傳曰獻公之子九

人

國語晉語二注

案服虔謂驪姬詛無畜羣公子欲令其二子

專國此本之晉語盡逐羣公子乃立奚齊焉始爲令國無

公族焉正與此傳相符孔氏云爲奚齊卓子以庶篡適晉

國創其爲亂不用復畜公子此說極得至云因驪姬之亂

乃設此詛非驪姬自爲詛殆未攷及外傳爾余故兩用之

趙盾爲旄車之族解旄車公行之官盾本卿適其子當爲公

族辟屏季故更掌旄車釋文旄車一本作輶

趙盾自以為庶子讓公族而為公行言為輶車之族明公行掌輶車服虔云輶車戎車之倅杜預云公行之官是也

詩汾沮  
如正義

三宜及延解鄭地

或云鄭州之南

案州屬  
開封府

或云即廩延也

隱元春秋  
地名攷略六

案

延釋文作鄉十二年鄉下杜解云鄭北地蓋即延地加邑作鄉也詳見石經考異

楚子伐陸渾之戎遂至於雒觀兵於周疆解雒水出上雒冢領山至河南鞏縣入河

王氏樵曰導洛自熊耳一節有兩熊耳地志謂伊水出盧

氏之熊耳山元和志山在盧氏縣南五里山海經郭璞謂伊

水出上洛之熊耳山地志謂洛水出上洛冢領山據經則

洛出熊耳上洛亦有熊耳與冢領同在一縣則洛出熊耳

明矣渭案漢志上洛縣東北有熊耳山括地志云熊耳山

在商州上洛縣西山海經曰洛出上洛西山又曰謹舉之

山洛水出焉案水經注同案上洛故城即今商州治案州在陝西省東界

盧州西五十里有熊耳山東西各一峯狀如熊耳因名山

海經所謂謹舉蓋即上洛熊耳之異名也冢領山在州西

北一百二十里志云州西三十里禹貢錐指十七餘雒

有二宣三年楚子至於雒王城也十五年晉侯還及雒晉

地也春秋分記疆理書十一服虔曰觀兵陳兵示周也史記楚世家集解案漢

書五行志下之下  
注曰示威武也  
陳氏傳曰窺周室也  
趙氏集傳八

定王使王孫滿勞楚子

服虔曰以郊勞禮迎之也  
史記楚世家集解

罔兩解水神釋文說文云山川之精物也正義魯語仲尼云  
木石之怪夔罔兩云云

淮南王說蜎蜎狀如三歲小兒赤黑色赤目長耳美髮  
說文  
十三  
蜎蜎山精好倣人聲而迷惑人也  
國語魯語下注

成王定鼎于郊鄠解郊鄠今河南也武王遷之成王定之  
周雒邑王城郊鄠陌五名河南縣西有郊鄠陌也  
杜氏土地名

括地志云故王城一名河南城本郊鄠周公新築在洛州  
河南縣北九里苑內東北隅自平王以下十二王皆都此



城至敬王乃遷都成周至赧王又居王城也帝王世紀云

王城西有郊鄩陌

史記周本紀正義

案周書郊雒北山名

案作雒解云南

繫于洛水北

音甲鄩謂田厚鄩故以名焉

史記楚系家索隱

京相

璠曰郊山名鄩地名也卜年定鼎爲王之東都謂之新邑

是爲王城其城東南名曰鼎門蓋九鼎所從入也故謂是

地爲鼎中楚子伐陸渾之戎問鼎于此

水經穀水注

郊鄩卽王

城之別名亦謂之郊桓七年遷盟向之民于郊襄二十四

年齊人城郊國語晉文公定襄王于郊是也今河南府西

有郊鄩陌亦謂之郊山圖經云郊山在郡城西南池邈至

城北二里亦曰邙山

春秋地名攷略一

卜年七百

爾雅爲詁訓之書特少所襲用大禹謨朕宅帝位三十有三載卽唐虞曰載肩征每歲孟春卽夏曰歲伊訓惟元祀太甲惟三祀商曰祀也泰誓惟十有三年春畢命惟十有二年周曰年也愚及質之今文書反多未合如唐虞純稱載不待論若商必曰祀何周公告成王曰肆中宗之享國七十有五年高宗五十九年祖甲三十三年及罔或克壽者亦俱稱年不等或曰此蓋以周之年述商在位之數云爾若對商臣言則曰惟十有三祀對商民言則曰今爾奔走臣我監五祀仍不沒其故稱矣愚曰然則多方亦有天惟五年須臾之子孫誕作民主罔可念聽非對商民以言商君者乎何亦稱年疑祀年古通稱不盡若爾雅之拘觀

周公稱高宗三年不言參諸論語戴記

坊記喪服四制

俱然及一

入說命便改稱三祀亦見其拘拘然以爾雅爲藍本而惟恐或失焉情見乎辭矣案宣和博古圖錄商兄癸酉銘曰惟王九祀周已酉方彝銘曰惟王一祀周亦稱祀太甲元祀惟梅氏書而劉歆真古文仍是元年商亦稱年又案左傳王孫滿於周曰卜年七百於商曰載祀六百是商不獨通稱年且稱載古人不拘類如此

尚書古文疏證七

以蘭有國香人服媚之

蘭爲王者香草

案詩溱洧正義曰陸璣疏云蘭卽蘭香草也春秋傳曰刈蘭而卒楚辭云紉秋蘭孔

子云蘭當爲王者香草皆是也案孔子之語見倚蘭操

故夢蘭者以其有國香離騷

滋蘭九畹植蘭百畝

案此句當是樹蕙百畝之譌

畱夷揭車則畦之杜

衡芳芷則雜種之又云覽椒蘭其若茲兮又況揭車與江  
離可知蘭之最貴而說者稱古者之摯天子鬯諸侯蕙大  
夫芝蘭士庶人艾

案周禮鬱人疏白虎通攷黜篇並引王度記云云與此小異

則蘭何

以爲王者之草也蘭雖天子諸侯所服又女子之事故古  
者女子佩之左傳曰季蘭尸之言有齊季女佩蘭而尸祭  
事又燕姑夢天與蘭亦曰人服媚之文公遂與之蘭而御  
之內則曰婦或賜之茝蘭則受而獻諸舅姑此蘭女事故  
一名女蘭淮南子

繆稱訓

曰男子樹蘭美而不芳情不相與

往來也

爾雅翼二

案凡蘭皆香蕙何嘗非蘭類乎羅氏必以

左傳楚辭之蘭爲幽蘭而以陸璣解蘭草爲非愚謂古人  
稱蘭特取其臭無煩生其分別不必定一幹一花而後謂

之蘭古人非若後世盜斗蓄蘭詫爲清供者也

文公報鄭子之妃曰陳媯解漢律淫季父之妻曰報

服虔曰報復也淫親屬之妻曰報漢律淫季父之妻曰報

則報與亂爲類亦鳥獸之行也

詩雄雉正義

誘子華而殺之南里解鄭地

南里有二襄二十六年楚入南里是鄭邑昭二十一年華

氏以南里叛是宋地

春秋分記疆理書十一

又娶于江生公子士朝于楚楚人酖之及葉而死解葉楚地

今南陽葉縣

楚滅江惡其所出爲害故酖之

惠氏補注二

楚遷許于葉王子

勝曰葉在楚方城外之蔽也楚子乃使遷許于析

昭十而

更以葉封沈諸梁號曰葉公東魏置襄州其地險隘高齊  
保此以備周今河南南陽府葉縣南三十里有古葉城

大事

表七  
之四

刈蘭而卒

案本草蘭入藥四五月采謂采枝葉也春秋左氏傳鄭穆  
公曰蘭死吾其死乎吾所以生也刈蘭而卒案鄭穆公以  
十月卒彼時十月今之八月非本草采用之時者蓋常人  
候其華實成然後刈取之也

說文蘭  
字繫傳

宣  
四及郟

東海縣帝少昊之後所封臣錯案杜預羸姓國也

說文郟  
字繫傳

郟今山東沂州府郟城縣西南百里有古郟城紀年云於

越子朱句三十五年滅郢今案史記楚世家頃襄王十八

年猶有郢國相去一百三十五年紀年誤大事表五案據昭

十七年傳注則郢出少皞為己姓無疑或言嬴姓則本之

漢志地理上作路史國名紀通志氏族略徐鍇蓋依班固

而誤作杜預也史記秦本紀索隱云郢國少昊之後而嬴

姓蓋其族也乃通志略又以為祁姓未知所本

莒人不肯

肯猶可也戰國策齊策一高注

取向解莒邑東海永縣東南有向城遠疑也

僖二十六年公會莒子衛甯速盟于向杜注莒地又襄二

十年仲孫速會莒人盟于向皆此也古永縣在今嶧縣西

北一里

案縣屬兗州府

去莒果遠寰宇記曰莒州南七十里

有向城近沂州西南百里有向城

案莒州屬今山東沂州府

參會道里差爲

近之

春秋地名攷略十二

餘見隱二年駁證

以順則公子堅長乃立襄公解襄公堅也

堅者靈公庶弟

史記鄭世家

徐廣曰年表云靈公庶兄

又集解

襄公將去穆氏

欲去穆氏懲子公也

義門讀書記

必滅若敖氏矣

若敖氏羊姓楚君若敖之後也謹案若敖者楚君熊義字

也或言楚國尊者稱敖如霄敖邾敖之類是也

通志氏族略三

圉伯嬴於轅陽而殺之遂處烝野解圉囚也伯嬴爲賈也轅



陽烝野楚邑

月令省囹圄蔡邕章句云囹圄牢也囹止也所以止出入皆

罪人所舍也然則囹圄亦周時之獄焦氏荅崇精曰囹圄

秦獄恐未然

案此鄭志正義引惠氏補注二

昭元年傳賈而欲羸而惡

跽乎說文云羸賈有餘利也羸羸古字通

周秦名字解故上

轅陽

烝野俱在湖廣荊州府江陵縣境

春秋輿圖

師于漳澨漳水邊釋例漳水出新城沔鄉縣南至荆山東

南經襄陽南郡當陽縣入沮

漳水在今湖廣安陸府當陽縣北四十里自南漳流入城

案南漳縣屬襄陽府

至縣東南五十里與沮水合名合溶渡

大事表八下

戰于皐澨解楚地

案水經注澧水出南陽雉山又東南與皐水合水出皐山  
是皐澣爲皐水之澣也

徐文靖管城  
碩記十一

皐澣在荊州府枝江

縣境

春秋  
輿圖

及鼓跗正義車上不得置簔簔以縣鼓故爲作跗若殷之楹  
鼓也

明堂位曰夏后氏之鼓足鄭康成曰足謂四足春秋之時  
楚伯棼射王鼓跗然則兵車之鼓亦有足與

禮書百  
二十一

案

吳語載常建鼓韋云周禮將軍執晉鼓建謂爲楹而樹之

此鼓置車上蓋卽晉鼓也

若敖娶於邲

邲亦作妘嬴姓子爵祝融之後

通志氏  
族略二

邲國今湖廣德安

府安陸縣治

春秋興圖

楚人謂乳穀釋文穀奴口反

如淳曰穀音構牛羊乳汁曰構

漢書敘傳注

案今黔蜀人呼

穀樹爲構樹以樹汁如乳也可知當時方音亦如是明朱謀埠水經河水一注箋云佛國記兩手構乳案大集月藏經云牛穀乳時出醇淨乳亦讀若構互相爲用餘詳莊卅年考異

其孫箴尹克黃解箴尹官名

楚有箴尹之官諫臣也

案通志氏族略四云箴尹主箴規之官呂氏春秋勿躬篇注

君天也

何休墨守曰君者臣之天也

文選陸士衡謝平原內史表注

五宣 高固解齊大夫

高宣子固 案本襄廿九年正義及唐書宰相世系表大事表十二上 詳莊九年

六宣 赤狄伐晉圍懷及邢丘解邢丘今河內平臯縣

赤狄子姬姓 杜氏世族譜 赤狄故上黨郡地有赤沙城 杜氏土地名

說文云赤狄本犬種案左氏傳云晉師滅赤狄潞氏杜氏

以潞赤狄之別種也今上黨潞縣 見十年 又春秋地名云今

曰赤涉胡 史記匈奴列傳索隱 懷卽周之懷邑 見隱十一年 邢丘今河南

懷慶府河內縣東南七十里平臯故城 大事表七之三 案韓

詩外傳三云武王伐紂到于邢丘更名邢丘曰懷則懷卽

邢丘矣何以至春秋時尚有邢丘之目爾雅云天下有名

丘五其三在河南愚謂地稱邢丘必有魁梧桀大之丘以

當之丘之所在仍存故號餘為懷地懷為今武陟縣亦隸

懷慶府可知界固相連耳

水經濟水一注云邢是丘名非國也

間一歲釋文開開廟之開

師古曰中開隔一歲

漢書五行志中之上注

宣公會齊侯伐萊解萊國今東萊黃縣

萊周不得姓之國子爵其俗夷故亦謂之萊夷今登州黃

縣東南二十五里有故黃城是萊子國襄六年齊滅之

今案

亦曰黃縣屬山東登州府通志氏族略二

萊有二襄六年齊滅萊是國名昭

七年與之萊柞魯二山名

春秋分記疆理書十一

案史記齊太公

至國萊侯來伐與之爭營丘營丘邊萊萊人夷也禹貢有

萊夷固已歷夏商而至周爵本侯而稱子者如杞即夷則

成子也萊入齊亦謂之邾

襄十四

萊之姓本無可攷說者以

襄二年有齊侯使諸姜宗婦來送葬召萊子之事遂謂其姜姓非也彼傳正義曰世族譜不知萊國之姓齊侯召萊子者不爲其姓姜以其比鄰小國意陵蔑之

取向陰之禾

晉向卽周之向邑

見隱十一年大事表七之三

宜春白狄及晉平夏會晉伐秦

此時白狄知赤狄之將亡而欲結晉以自固也

大事表三十九

晉人獲秦謀殺諸絳市

六年伐秦虜秦將赤

史記晉世家

赤卽斥謂斥侯之人也案宣

八年左傳晉伐秦獲秦謀殺諸絳市蓋彼謀卽此赤也晉

成公六年與魯宣八年正同故知然也

又索隱

晉此時未遷

新田蓋故絳之市也

大事表七之三

案赤斤聲近故字與讀移

水經洹水注斥丘朱謀埠箋云舊本作赤丘可證也

有事于大廟襄仲卒而繹非禮也

孟獻子曰正月日至可以有事於上帝

正月周正月建子之月也日至冬至

也七月日至可以有事於祖

七月周七月建午之月也日至夏至日也七月而

禘獻子爲之也

禮記雜記下

明堂位稱季夏六月以禘禮祀周

公於大廟周之季夏卽夏之孟月

四月

建巳之月又春秋宣

八年六月辛巳有事于大廟謂禘祭也是用建巳之月案

春秋宣九年獻子始見經

案文十五年獻子已見傳

案僖八年於時未

有獻子而七月禘者鄭荅趙商云以僖八年正月公會王

人于洮六月應禘以在會未還故至七月乃禘君子原情  
免之禮不合譏而書之者爲致夫人故書七月禘也獻子  
旣七月而禘非時失禮春秋之例非時祭者皆書於經以  
示譏獻子以後之禘而用七月不書於經而不譏者鄭釋  
癘疾云宣八年六月有事于大廟禘而云有事者雖爲卿  
佐卒張本而書有事其實當時有用七月而禘因宣公六  
月而禘得禮故變文言有事春秋因事變文見其得正也  
如鄭此言則獻子之時禘皆非正因宣公六月禘爲得正  
故變文云有事以明餘禘之不正也故餘禘不載於經唯  
譏於宣公得正之禘也鄭又一解云禮記之言不可合於  
春秋之例故鄭荅趙商云禮記之云何必皆在春秋之例



是禮記不與春秋合也

又正義

祔與繹二者俱時爲之故郊

特牲云繹之於庫門內祔之於東方失之矣鄭注云祔之

禮宜於廟門外之西室繹又於其堂神位在西此二者同

時而大名曰繹其祭禮簡而事尸禮大宣八年左氏傳辛

巳有事于大廟仲遂卒于垂卿佐卒輕于正祭不合廢但

繹祭禮輕宜廢而不廢故譏之云壬午猶繹

儀禮有司徹疏襄仲

卒而猶繹逐東門之漸也

義門讀書記

楚爲衆舒叛故伐舒蓼滅之解舒蓼二國名正義舒蓼二國

名者蓋轉寫誤當云一國名案釋例土地名有舒羣舒舒蓼

羣舒下明刊本汲古本空一字山舒庸舒鳩以爲五名

釋例曰舒有五名舒庸舒龍舒口舒鳩舒城其實一也

太平

御覽州郡部十五

案此文互異舒卽文十二年之羣舒乃諸

舒總名釋例不當以爲五名御覽所引與正義所引釋例不同疑竝有脫誤文十二年正義引世本有舒庸舒蓼舒鳩舒龍舒鮑舒龔其名爲六而傳所見者惟庸蓼鳩耳詳文傳下

及滑汭解滑水名

當在今江南

安徽

廬州府東境水之隈曲曰汭蓋楚拓疆至

滑汭之界

日講春秋解義二十八

盟吳越而還解吳國今吳郡越國今會稽山陰縣也

吳國于梅里今江南

江蘇

常州府無錫縣東南三十里有太

伯城諸樊南徙吳闔廬築大城都之今蘇州府治是越國

于會稽今浙江紹興府治山陰縣

大事表五

秋七月甲子日有食之既

庚申歲

經書七月甲子日食大衍在十月杜預暨自僖公十二年  
至文公元年五年一閏者二也四年一閏者三也失二閏  
焉又自文公十六年至宣公十年凡四年一閏者三也又  
失一閏焉此預據左氏再失閏之說廢閏以爲歷預是爲  
傳而爲歷非爲經而爲歷也預歷七月乙未朔不入食限  
而其甲子晦亦不入食限焉姜岌謂其誤者五此其二也  
今從大衍日食黃道角五度半

春秋分記  
歷書三

姜氏云十月甲

子朔食大衍同今歷推之是歲十月甲子朔加時在晝食

九分八十一秒蓋十誤爲七

元史歷  
志二

案杜氏長歷以七

月甲子爲三十日則是晦食非也長歷又云十月甲子朔  
余因悟春秋經秋七月三字乃書之以備一時下經冬十  
月三字合在此甲子之上不書朔者史闕文本是錯簡杜  
氏誤解之爾

晉胥克有蠱疾解惑以喪志

錢塘汪瑜曰杜解本昭元年傳義案漢張仲景云狐惑之  
病狀如傷寒默默欲眠目不得閉起臥不安此與今俗所  
云色暈相類

冬葬敬嬴 雨不克葬禮也禮卜葬先遠日辟不懷也

案異義公羊說雨不克葬謂天子諸侯也卿大夫臣賤不  
能以雨止穀梁說葬既有日不爲雨止左氏說卜葬先遠

日辟不懷言不汲汲葬其親而不可行事廢禮不行庶人不爲雨止許慎謹案論語云死葬之以禮以雨而葬是不行禮穀梁說非也從公羊左氏之說鄭氏無駁與許同案釋癸疾云雖庶人葬爲雨止公羊說卿大夫臣賤不能以雨止此等之說則在廟未發之時庶人及卿大夫亦得爲雨止若其已發在路及葬則不爲雨止其人君在廟及在路及葬皆爲雨止

禮記王制正義

春秋葬皆用柔日宣八年冬十月己丑葬我小君敬嬴雨不克葬庚寅日中而克葬定十

五年九月丁巳葬我君定公雨不克葬戊午日下昃乃克

葬己丑丁巳所卜之日也遲而至於明日者事之變也非

用剛日也

經文所書葬列國之君無非柔日者惟成十五年秋八月庚辰葬宋共公是剛日其亦雨不克

葬遲而至於漢人不知此義而長陵高帝以丙寅茂陵武帝以

甲申平陵昭帝以壬申渭陵元帝以丙戌義陵哀帝以壬寅皆用

剛日穆天子傳盛姬之葬以壬戌疑其書爲後人僞作知

錄案曲禮外事以剛日內事以柔日鄭氏云順其出爲

陽順其居內爲陰孔氏云十日有五奇五偶甲丙戊庚壬

五奇爲剛乙丁己辛癸五偶爲柔也葬爲內事屬陰用剛

日者非其義已

### 城平陽解今泰山有平陽縣

魯平陽在今山東泰安府新泰縣西北四里案魯有兩平

陽此東平陽也西平陽本邾邑爲魯所取見哀二十七年

大事表又晉衛俱有平陽昭二十八年魏獻子以趙朝爲

七之一

平陽大夫哀十六年衛侯飲孔悝酒於平陽

大事表六之下

九宣

取根牟解根牟東夷國也今琅邪陽都縣東有牟鄉

根牟高陽氏後曹姓子魯宣取之

路史國名紀三

案公羊根牟邾

婁之邑非也昭八年蒐于紅自根牟至于商衛革車千乘

卽此

春秋地名攷略十四

今山東沂州府沂水縣東南有牟鄉

大事表五

公卿宣淫解宣示也

宣明也揚也

陸氏附注二

詩云民之多辟無自立辟其洩冶之謂乎解辟邪也辟法也

詩大雅言邪辟之世不可立法國無道危行言孫釋文多辟

本又作僻匹亦反注同邪也立辟婢亦反法也注同

以上辟爲邪下辟爲法當時有此解昭二十八年晉司馬

叔游引此詩亦同漢張衡思立賦覽烝民之多僻兮畏立

辟以危身正用此也

顧氏補正中

吾死無日矣

無日無日數也

國語周語下注

宣夏四月丙辰日有食之解不書朔官失之

壬戌歲

今歷推之是月丙辰朔加時在晝交分十四日九百六十

八分入食限

元史歷志二

崔杼有寵於惠公高國畏其偪也公卒而逐之奔衛書曰崔氏非其罪也且告以族不以名

自此至崔杼弑君凡五十一年惠公之世杼應尚幼成十七年傳言齊侯使崔杼爲大夫明前此未仕故此年傳說



者不取

案趙鵬飛春秋經筌家鉉翁春秋詳說並疑之

今以告以族之說推之蓋

崔氏出自丁公杼之祖若父必有嘗爲卿者至杼雖未爲卿其寵已足以偪高國此高國之所惡也故因惠公卒舉族出之杼未爲卿故不書名實卿族也故來告書其族如尹氏非王卿士於法不合書其立王子朝亦由世是卿族故史不得不書春秋辭從主人而世卿之失自見公羊譏世卿之說不爲無所出也

趙氏補注五

公如齊奔喪

德惠公之定其位故奔喪

義門讀書記

劉康公解卽王季子也其後食采於劉

劉子始封爲匡王少子劉康公

大事表七之一

案經下解云王

季子者公羊以爲天王之母弟則是定王之少弟匡王之季子而通志氏族略三以爲成王封王季之子於劉邑此姬姓之劉也以邑爲氏世爲周卿士愚謂劉康公旣王季之後春秋不當稱王季子蓋王季卽公季之尊號固與太王並稱不得援以字爲氏之例也此王季子者亦如王叔文公之類通志以經書王季子遂謂是王季之後謬已劉邑詳隱十一年

子家解歸父襄仲之子

東門子家莊公之孫東門襄仲之子公孫歸父也

國語周語中注

國武子

國佐齊卿國歸父之子國武子也

歸父

見傳二十八

國語周語下注

逐楚師于潁北解潁水出河南陽城至下蔡入淮

水經注潁水出潁川陽城縣西北少室山又東南過陽翟

縣北陽翟今禹州

案州屬河南開封府

潁北當在禹州之北成十六

年諸侯師于潁上襄十年晉師與楚夾潁而軍亦禹州之

潁也

大事表八上

宣十

楚盟于辰陵解辰陵陳地潁川長平縣東南有辰亭

辰陵在河南陳州府淮寧縣西南四十里長平故城在今

府城東六十里

春秋輿圖

楚左尹子重解子重公子嬰齊

楚公子嬰齊字子重急就章云伊嬰齊顏師古注云嬰齊謂嬰兒之絜齊者也案鄭罕嬰齊字子齧則嬰齊謂齒矣

說文齧齒參差齧齒差跌兒春秋傳曰鄭有子齧齧齧古  
字通用參差差跌皆不齊也差與重一聲之轉重疊亦不  
齊也名嬰齊者嬰與古字通說文嬰頸飾也从二貝莊子  
盜跖篇齒如齊貝漢書東方朔傳齒若編貝周秦名字  
解故下  
王待諸鄆解楚地

鄆當在河南陳州府項城縣境

大事表  
七之四

鄆有二宣十一年

楚左尹侵宋王待諸鄆楚地也十二年楚子北師次於鄆

鄭地也

春秋分記疆  
理書十一

令尹蔦艾獵城沂解艾獵孫叔敖也沂楚邑正義服虔亦云  
艾獵蔦賈之子孫叔敖也此年云令尹蔦艾獵明年云令尹  
孫叔敖明一人也世本艾獵爲叔敖之兄世本多誤本必不

然案浦氏正字云此四  
字疑未必然也之誤

楚相孫叔敖碑楚相孫君諱饒字叔敖釋云左氏傳載為

敖宣十薦艾獵杜預皆以為叔敖它書但云孫叔敖此碑

獨言其名饒未知何據洪氏隸  
釋三定五年大敗夫槩王于沂

即此地在今汝寧真陽縣境今河南汝寧府正陽縣  
春秋地名攷略八案

唐書宰相世系表以叔敖為薦章之曾孫潛夫論志氏姓  
謂章之子也非

薦呂臣之孫本出薦氏而更稱孫氏者叔敖係王子薦章

之後自其父薦賈為子越椒所殺遂失職式微甌處海濱

莊王知其賢擢為令尹本四書  
釋地語蓋叔敖不忘故族以孫為

氏即王孫氏之意其子請封寢丘不顯於朝故孫氏傳亦

不見叔敖又名饒者乃譜家傳會之言不足取信特以敖

饒聲相近爾顧亭林金石文字記云此碑見於水經注言在期思縣城西北隅楚相孫叔敖廟前然作文之人似不曾見春秋史記者其文云叔敖爲相人有曾閔貞孝之行叔敖相楚莊王乃魯宣公時而曾閔二子魯定哀間人當楚昭王惠王之世援後贊前已爲不順又云繼高陽重黎伍舉子文之統則大可異伍舉乃靈王時人在叔敖後四五十年而邲之戰叔敖所斥嬖人伍參卽舉之父乃云繼其統何耶又云仕於靈王又云卒而莊王封之案莊王子共王共王子康王靈王今反以靈王居莊王之前可謂目不知書者矣履繩謂此駁又洪氏所不及馬宛斯繹史載此碑文亦疑之餘見此年駁證孔廣杖曰齊魯邾皆有沂

見襄十八年昭二十五年哀二年

使封人慮事以授司徒解封人其時主築城者慮事無慮計功司徒掌役

版築之事孫叔敖已洞曉如何卻使封人慮事蓋不親細務深得爲上之大體規模曲折雖自知之又須是衆謀使親其事者具上規模條目然後從而增損裁正之下不侵有司之事築城是小事獨問守封疆之小臣此亦見深慮無不當

呂氏春秋左氏傳說五

量功命日解命作日數

量功是量用功之多寡命日是度其日子多少

左氏傳說五

分財用解財用築作具

財用謂芻茭版築分謂看四隅所費多少而分配撥料之

左氏傳  
說五

平板榦解榦植也正義等其高下使城齊也

平是商量必平其高低厚薄板榦謂合當築幾雉

左氏傳  
說五

案古築城之板諸說不同韓詩外傳以八尺爲板何休

注公羊傳本之

定十年

詩鴻鴈毛傳云一丈爲板鄭箋據公

羊以爲板六尺此皆言板之長短蓋因地制宜未定畫一

故各以意度之高誘戰國秦策四注曰廣二尺曰板此則

諸儒無異說也

詳見隱  
元年

稱畚筮解量輕重畚盛土器正義築者築土之杵司馬法輦車所載二筮是也稱畚筮者量其輕重均負土與築者之力



也

稱謂一人可以運幾工一人可以築幾堵畚是度其負土之多寡不使虛費人得預其間築下手也

左氏傳說五

程土物解爲作程限正義謂鍤鑿畚舉之屬爲作程限備豫也

程是料度用得多少土是泥也物是材木也

左氏傳說五

議遠邇解均勞逸

謂就近取水取土如百步與五十步去百步內取已爭一

半

左氏傳說五

略基趾解趾城足略行也

先巡略基趾闊狹高下方圓曲直都安排之

左氏傳說五

具餼糧解餼乾食也

謂先辦其役夫之糧食

左氏傳說五

度有司解謀監主

審度有司各稱其材謂如材有餘者可以領大事至若無材之人卻能謹信者則可使之監視有便利輕捷者可以供來往度謂如使謹信者治財卻不得若令監視則必專其材亦不至於無用

左氏傳說五

事三旬而成不愆于素解十日爲旬不過素所慮之期也傳言叔敖之能使民

惟其精密詳細如此所以事三旬而成不愆于素蓋謂今日用事與前日所料條目一般並無增損至後來用事這

裏添一件那裏又退一件如此是愆于素也

左氏傳說五

案

凡舉鉅工規模早定自可計日而竣非若剋期迫促也叔敖賢相必不速成以勦民而民自踊躍赴功悉聽指授有百堵皆興之象杜氏第云不過其期亦淺之乎論叔敖已晉卻成子求成于衆狄衆狄疾赤狄之役遂服于晉秋會于欒函衆狄服也解赤狄潞氏最強故服役衆狄欒函狄地

冀缺卻成子也

國語晉語五注

衆狄係白狄之種類若鮮虞肥鼓

之屬是也晉侯親在會

據經文

蓋欲攜赤狄之黨以絕其援

至十五年遂滅潞氏

六事表三十九

其從之也

言往而會狄

顧氏補正中

將討於少西氏解少西徵舒之祖子夏之名

少西字子夏宣公乎

春秋分記  
世譜三

輶諸栗門解輶車裂也

刑止於五而秋官條狼氏誓馭曰車輶此春秋時嘗有之  
至秦用之豈成周之法哉

因學紀  
聞二

案何氏焯云春秋之

時周禮未改愈可徵周官非僞書但非常重典故不在五  
刑之屬惟弑逆之賊乃偶一用耳履繩謂春秋固多亂制  
然尚沿成周之法如昭廿二年焚諸王城之市卽易所謂  
焚如之刑也秋官掌戮云殺其親者焚之鄭氏引易爲證  
掌戮又云斬殺賊謀而搏之鄭破搏字讀從或二年膊諸  
城上之膊是非皆周之刑法乎惟醢與刖尸眞所謂淫刑

以遲矣

申叔時

申氏舟生犀宇生亥驪包胥不詳其世申叔氏時生詭詭  
生叔豫又叔展壽餘公子牟案楚之申氏有三申公巫臣  
之後屈氏別族也申舟之後及申字卽申氏也申叔時而  
下申叔氏也世族譜乃以申叔時申叔跪成二合于申氏之  
後世系從之以叔時系之申亥誤矣春秋分記世譜七  
牽牛以蹊人之田解蹊徑也

蹊者先無行道初爲徑路之名

詩絛正義

吾儕小人

說文曰儕等輩也鄭康成曰儕猶輩類

樂記注氏補注二惠

案

吾儕猶昔人云我輩也昭元年正義曰儕等也言吾等於

彼卑賤此解未免迂曲

鄉取一人焉以歸謂之夏州解州鄉屬示討夏氏所獲也

鄭司農云二千五百家爲州論語曰雖州里行乎哉春秋

傳曰鄉取一人焉以歸謂之夏州周禮地官注云言取討

夏徵舒之州案惠氏以爲服虔注又疏東有夏州海陽史記蘇秦列傳徐廣

曰楚考烈王元年秦取夏州駟案左傳楚莊王伐陳鄉取

一人焉以歸謂之夏州而注者不說夏州所在車胤撰桓

溫集云夏口城上數里有洲名夏州東有夏州謂此也又集

解大江中州也夏水口在荊州江陵縣東南二十五里又

義案高氏地名攷略云以討夏氏而謂之夏州非因夏

水得名也愚謂索隱引劉伯莊以爲夏州侯之本國然夏  
侯州侯自是兩地見戰國楚策四豈戶口日繁至戰國時地亦漸  
廣遂封二侯分食一邑仍存其故名乎

補釋十二年趙宣公十二年盡十八年

左通一

錢塘梁履繩學

二宣十三月克之

時鄭石制為內間故楚得以克鄭見下傳惠氏補注二

八自皇門

賈逵曰鄭城門何休曰郭門也史記楚世家集解皇門城南門也

諸侯國各以其所向之地為名皇周邑見昭廿二蓋走王畿之

道也春秋地名攷略六案是說終屬彊解或皇為大義如冢前

闕曰經皇寢門闕曰室皇乘舟名餘皇之類

敢不唯命是聽

左傳言維命者皆謂受其節度聽其進止詩卷阿正義案孔



氏引傳以解維君子使句故易唯爲維二字可通用

其俘諸江南以實海濱亦唯命

此句具有兩層義楚文王滅羅徙羅子於長沙故長沙有汨羅鄭若滅得徙於楚之南徼爲江南此一義也實海濱楚世家作賓之南海古以與字通用言不得徙楚境內卽填實於百越之地爲海濱之民此又一義也

潛丘劄記三 楚初

都丹陽在枝江居江南後徙郢都在荊州府居江北別都鄂卽武昌府亦在江之南自荊州以南皆楚所謂江南也楚遷權于郢處遷六小國于荊山在江北遷羅于枝江遷許于華容在江南鄭欲自比于此屬耳春秋時未知有南海屈完對齊桓公云寡人處南海不過漫爲侈大之辭實

非楚境鄭請實海濱亦自貶損以悅之也

春秋地名攷略八

敢布腹心

以心爲五藏之主腹爲六府之總詩曰公侯腹心左傳云

敢布腹心是腹心足以表內

計盤庚下正義

潘尪解楚大夫

潘尪卽師叔

本傳

疑崇之子

潘崇見文元年萬氏氏族略

案下傳潘黨

亦稱叔黨杜云尪之子本成十六年潘尪之黨文也定六年有潘子臣疑是其後

先穀

軫

僖廿七

子穀

春秋分記世譜二

韓厥解韓萬立孫正義韓世家云韓之先事晉得封韓原曰

韓武子後三世有韓厥世本云桓叔生子萬萬生求伯求伯生子與子與生獻子厥史記所云武子蓋韓萬也如彼二文厥是萬之曾孫而服虔杜預皆言厥韓萬玄孫不知何所據也

獻子韓萬之玄孫子與之子厥也

國語晉語五注

案僖十五年

杜解云韓簡萬之孫成二年解云子與韓厥父故史記索隱所引系本求伯下多定伯簡一代其爲玄孫無疑詳見僖十五年

君無怨讟

解讟謗也

師古曰讟痛怨之言也

漢書五行志上注

兼弱攻昧武之善經也子姑整軍而經武乎猶有弱而昧者

何必楚仲虺有言曰取亂侮亡兼弱也洵曰於鑠王師遵養時晦耆昧也武曰無競惟烈撫弱者昧以務烈所可也

逸周書武稱曰口強攻弱而襲不正武之經也

惠氏補注二

仲

虺之誥曰兼弱攻昧取亂侮亡推亡固存邦乃其昌辨曰據左傳惟取亂侮亡一句爲仲虺語兼弱攻昧爲古武經語故引書以明兼弱引詩以明耆昧又引詩以總明撫弱耆昧也若書辭果有兼弱攻昧取亂侮亡二句隨武安得特分取亂侮亡句爲仲虺之言乎襄十四年中行獻子曰仲虺有言曰亡者侮之亂者取之推亡固存國之道也襄三十年子皮曰仲虺之志云亂者取之亡者侮之推亡固存國之利也皆僅有取亂侮亡無兼弱攻昧足以爲證其

曰亂者取之云云孔疏謂取彼尚書之意而改爲之辭其  
 言非本文是也但并隨武子釋書之語所謂兼弱者盡八  
 之仲虺口中且并其釋灼詩之攻昧二字而亦入之則蒐  
 竊之迹殊不可掩耳王鳴盛尚書後辨烈所者功烈之處所也猶  
 民知義所之所陸氏附注二案逸周書武稱曰賢者輔之亂

者取之與佑賢輔德句義相同下句則與傳所引無異安  
 知取亂侮亡及亡者侮之云云非即本書之上下文而左  
 氏分引之耶或云若非隨引書意則左氏不應前後顛倒  
 其辭余謂文十年傳引大雅烝民詩剛亦不吐柔亦不茹  
 與毛詩互易左氏多引毛氏詩如襄十四年行歸于周萬民所望是也古人原不屑屑  
 于文字間也後辨略本尚書古文疏證卷一及卷八

彘子解先穀正義服虔云食采於彘或當然也見上先穀下

河東郡永安故彘續漢書郡志一杜預曰縣東北有彘城注又彘

晉地漢為縣屬河東今日永安國語周語上注案先穀族滅後

士魴食邑于彘故稱彘恭子見成十八其子彘裘即以邑為氏

襄十四服說是也永安今山西霍州餘詳昭廿六年荀子成相篇注

引彘子亦以彘為地名

知莊子解荀首釋文知季音智荀首後為智氏見下傳

智氏姬姓即荀氏荀首別食智邑又為智氏通志氏族略三案後

漢郡國志注所引博物記河東解縣有智邑則氏於邑者

也羅萃路史注言首邑於知故為知氏高辛紀下本此沈氏小疏

案解為今山西解州餘詳僖廿七成十八哀廿三年

師出以律否臧凶解此師卦初六爻辭律法否不也

震爲出坎爲律臧善也初失位故不臧凶

惠氏周易述二

有律以如已也解坎爲法象正義釋言云坎律銓也云云

晉書郭璞傳璞上疏曰坎爲法象刑獄所奉是次卦主法

易家之舊說也

邵氏爾雅正義三

次於郟解鄭北地

郟卽三年傳之延也

周宣武左傳附論

詳前傳下

沈尹將中軍解沈或作寢寢縣也今汝陰固始縣正義楚官多名爲尹沈者或是邑名而其字或作寢哀十八年有寢尹吳由于因解寢爲縣名不言寢是而沈非也

寢沈國之別邑

沈國詳文三年

楚取之以爲重鎮故沈尹見於春

秋甚詳康王時有沈尹壽

襄廿四

靈王時有沈尹射

昭四

平王

時有沈尹赤

昭五

昭王時有沈尹戌

昭九

惠王時有沈尹朱

哀十

邑本名寢楚人因取之於沈遂謂之沈至光武時改

名固始今屬河南光州

大事表七之四

案沈作寢者乃或本疑

後人因孫叔敖之子封於寢丘遂謂將中軍者必是孫叔

輒改沈爲寢不知此時尚未封寢地而令尹本不在三軍

之數

呂東萊說

高誘注呂氏春秋以爲沈縣大夫是也

尊師篇 沈

尹與孫叔敖同事楚莊王故呂氏春秋當染尊師察傳贊

能諸篇並連舉之然本作沈尹蒸或作沈尹巫沈尹筮沈

尹莖新序雜事第五篇又引作沈尹筮其名各異而體適

相似韓詩外傳二作沈令尹未知所從高士奇姓名同異



攷云孫叔敖亦曰沈尹者因韓傳而誤也地名攷略又云  
時爲沈尹者莊王之子公子貞愚攷公子貞字子囊襄五  
年爲楚令尹楚語上注子囊恭王弟於莊王時已爲沈尹  
不知所據傳既不載沈尹之名當闕以俟攷再案韓詩外  
傳二載沈令尹事新序雜事一列女傳二並作虞丘子又  
外傳七虞丘說苑雜言作沈尹則知沈尹之氏爲虞丘惟  
名尚莫能定也

嬖人伍參解參伍奢之祖父

楚伍氏芊姓也

潛夫論  
志氏姓

晉之從政者新未能行令

楚伍參曰晉之從政者新謂荀林父也士彌牟曰晉之從

政者新謂范鞅也

元定

一以喪師一以失諸侯書曰人惟求

舊

國學紀聞六

何云新謂任未久非驟居執政之謂也閻云林

父從政在本月范鞅從政僅十日

注又

次于管以待之解滎陽京縣東北有管城正義土地名古管國也

在今河南開封府鄭州北二里卽管叔鮮所封國管除屬

檜檜滅屬鄭

大事表七之二

晉師在敖郛之間解敖郛二山在滎陽縣西北

今河南滎澤縣西北有敖山

日講春秋解義二十九

河水北逕碣磧

城西述征記曰碣磧津名也

水經漂水注

案太平御覽碣磧城

沈約宋書作敲磬字今酈注作碣磧音聲之轉耳史記殷

本紀仲丁遷于傲孔安國曰河南敖倉是也索隱曰傲亦作囂並音敖字又詩車攻薄狩于敖左傳晉師救鄭在敖

鄙之間杜預以爲二山名皆一地也

趙一清水經注箋刊誤二

案今

尚有敖倉之稱字作廩者俗也此鄭之鄙與哀四年晉之鄙異一音苦交反一音呼洛反晉鄙爲今直隸趙州柏鄉縣而敖山在今開封府之滎澤縣傳云敖鄙之間知鄙山當亦相近郡國志于滎陽有敖亭下引此傳文可證也

紂之百克而卒無後

紂之百克傳記無文蓋紂木材力過人觀紀年所載大閼者一大蒐者再又王師伐有蘇紂之好兵黷武于此略見詩稱殷商之旅其會如林周本紀云紂發兵七十萬人距

武王苟以此衆戰何患不克傳言百克者特恃其兵力之  
彊盛而無德以保之耳如史記魏世家所謂外黃徐子有  
百戰百勝之術淮陰侯傳所謂成安君有百戰百勝之計  
一旦而失之是也

周氏左  
傳附論

箠路藍縷解箠路柴車藍縷敝衣正義服虔云言其縷破藍  
藍然

服虔曰華露柴車素大輅也藍蔓言衣敝壞其蔓藍藍然  
也

史記楚世家  
集解

詳昭十二年攷異

箴之曰民生在勤勤則不匱

生如生於憂患之生蓋心生生不窮勤則生矣生則烏可  
已也怠焉則放放則死矣故公父文伯之母曰民勞則思

思則善心生

見魯語下  
困學紀聞六

案勤則不匱卽上年傳卻成

子所謂能勤有繼也並爲先正之格言余世父嘗集聯句  
云民生在勤勤則不匱慮善以動動惟厥時以履繩嗜讀  
左氏手寫集聯云行道有福能勤有繼居安思危在約思  
純命揭之座右以代耳提敬附錄於此

其君之戎分爲二廣廣有一卒卒偏之兩解君之親兵十五  
乘爲一廣司馬法百人爲卒二十五人爲兩車十五乘爲大  
偏今廣十五乘亦用舊偏法復以二十五人爲承副正義劉  
炫云兩廣之別各有一卒百人一卒外復有偏一兩二十五  
人兵法十五乘爲偏偏有一兩從之兩是偏家之物故謂此  
爲偏之兩其實一廣十五乘有一百二十五人從之

諸侯成方十里出賦之時雖革車一乘甲士三人步卒七

十二人

案此是畿外邦國法與畿內一成三百家革車一乘士十人徒二十人之法不同詳見周禮小司徒

疏其臨敵對戰之時則同鄉法五人爲伍五伍爲兩之屬

也

小司徒文

故左傳云邲之戰楚廣有一卒卒偏之兩又云兩

之一卒適吳

成

是臨軍對陳同鄉法也

禮記坊記正義

案周制車

一乘甲士三人步卒七十二人則十五乘已有兵一千一

百二十五人今楚乘廣之法復有卒百人兩二十五人是

於周制之外復增一百二十五人爲乘車之副合二廣凡

得二千五百人矣

下傳乘廣三十乘大事表十四

許伯曰吾聞致師者御靡旌摩壘而還樂伯曰吾聞致師者左射以敢代御執轡御下兩馬掉鞅而還攝叔曰吾聞致師

者右入壘折馘執俘而還皆行其所聞而復解靡旌驅疾也  
摩近也左車左也敢矢之善者兩飾也掉正也示閒暇折馘  
斷耳

鄭康成曰摩猶迫也

見樂記注

軍壁曰壘

見夏官量人注

案既夕禮云

御以蒲菽鄭注云蒲菽牡蒲莖也古文敢作騶漢書鼃錯  
傳云材官騶發矢道同的如淳曰騶矢也小顏曰騶謂矢  
之善者也左氏傳作敢字其音同耳則知古敢字作騶惠氏

補注

左氏傳晉楚交戰楚許伯御樂伯已下謂凡兵車之

法射者在左御者在中戈盾在右敢矢之善者捫猶飾也

掉猶正也

案正義引兩掉之義云服虔亦然知此疏並用服注

言折馘執俘者死者

取左耳曰馘生者曰俘執取之云皆行其所聞而復之者

去時所言及至晉師皆行其所聞之事而復反

周禮夏官環人疏

及滎澤解在滎陽縣東

滎澤鄭康成杜預並云在滎陽縣東京相璠云在縣東南

見水

未審孰是今滎澤縣南

案縣屬河南開封府

相傳為古滎澤即

此也元和志滎澤在滎澤縣北四里恐誤括地志云滎陽故城在滎澤縣西南十七里今治與隋置皆在其東北故此澤舊在滎陽縣東隋唐至今則在滎澤縣南也自東漢時已塞為平地故周徑里數志家莫能言之

禹貢錐指八

獸人

周禮天官獸人掌罟田獸

大事表十

請挑戰釋文挑徒了反

見上致晉師傳下



李奇曰挑身獨戰不復須衆也挑音茶了反瓚曰挑戰撓

燒敵求戰古謂之致師

見漢書高帝紀注  
史記項羽本紀集解

士季使鞏朔韓穿帥七覆于敖前故上軍不敗趙嬰齊使其  
徒先具舟于河故敗而先濟

傳因士季語竟言之

顧氏補  
正中

養由基

先鄧大夫有養甥楚地璠云襄城郟縣西南有養水由基

之邑郟城今隸汝

案璠說見水經汝水注郟縣今  
屬河南汝州路史國名紀三

養姓由

基名楚善射人也

案淮南說山訓注同  
戰國策西周策高注

案昭卅年楚

逆吳公子使居養疑由基卽食邑于此故以邑爲氏通志  
氏族略五養氏下亦引之襄十三年稱養叔卽其字後漢

書班固傳云游基發射

文選作由基

特舉其名至如北史楊播

傳養由之妙抱朴子知止篇養由之射文選張華勵志詩

養由矯矢二名單舉乃古人行文習用不可據依

得其甲裳

解下曰裳

考工記曰凡爲甲必先爲容然後制革權其上旅下旅而重若一鄭司農云上旅要以上下旅要以下賈公彥曰以札衆多故言旅上旅衣也下旅裳也春秋傳曰弃其甲裳

案疏引作弃字者因涉上弃車而走林句禮書百十六

潘黨望其塵

孫子曰塵高而銳者車來也

惠氏補注二

告唐惠侯

解

唐屬楚之小國義陽安昌縣東南有上唐鄉

唐本堯後封在夏墟而都於鄂鄂今在大夏是也及成王

滅唐之後又分徙之於許郢之間故春秋有唐成公是也

見定三年卽今之唐州也

史記晉系家索隱

唐侯祁姓堯後今湖廣德

安府隨州西北八十五里有唐城鎮

大事表五

案通志氏族

略二以唐爲祁姓又引釋例唐姬姓又公子譜一曰成王

封叔虞於唐號曰唐叔侯其子燮父之後春秋時國小微

弱遂屬爲楚邑史記楚世家正義引世本云唐姬姓之國

履繩謂舜封丹朱爲唐侯

氏族略

至周成王滅之而封叔虞

仍號爲唐其子燮父因南有晉水遂改爲晉侯

詩譜

蓋成王

徙封堯裔猶存唐國故復命改唐爲晉氏族略所云晉之

唐楚之唐是已其謂唐爲姬姓者終涉晉唐而誤亦以漢

陽諸姬楚實盡之遂槩指爲姬姓猶之隨本姜姓而亦誤

姬也

見桓六年駁證

使潘黨率游闕四十乘解游車補闕者

游闕者游車闕車也外傳曰戎車待游車之裂

齊語

周禮車

僕有闕車之倅

正義亦引惠氏補注二

宋氏測要曰

明宋徵璧作左氏兵法測要

意卽八陳所謂握車游軍也又曰總之三軍者正軍也兩

廣者親兵也游闕者奇兵也

慎氏闡義

駒伯解郤克成十七年解駒伯郤錡

駒郤克采與子錡皆謂駒伯

路史國名紀五

案父子同稱駒伯

猶趙襄子亦號趙孟也惠氏以爲郤錡字駒伯克之子

見

成十大夫門子得從父于軍鄢陵之戰范匄從文子在軍

此其證也是與成傳杜解合

屈蕩戶之解戶止

古人以守戶之人謂之戶者取其能止人也漢書樊噲傳

詔戶者無得入羣臣王嘉傳坐戶殿門失關免唐書李紳

傳擊大毬戶官道車馬不敢前

案蘇轍樂城集石芝詩若籠蕉囊海神戶自注引此

傳文顧氏補正中

楚人基之解基教也

訓基為教蓋本小爾雅

惠氏補注二

趙叟在後解叟老稱也

叟有兩號若孔注尚書西蜀叟

牧誓

叟是頑愚之惡稱若左

氏傳云趙叟在後叟是老人之善名

儀禮喪服傳疏

案叟與叟

同孟子趙注叟長老之稱猶父也此尊之之辭若田叟山叟乃高年之通呼耳

尸女於是

尸女者收女尸

穀梁傳三十三年傳注

以表尸之解表所指木取其尸

後漢書蓋勳傳云指木表曰必尸我於此注云表標也句

義正用此傳文

周氏左傳附論

囚知螢解知螢知莊子之子

子羽螢之字

國語晉語七注

非子之求而蒲之變董澤之蒲可勝旣乎解蒲楊柳可以爲箭董澤澤名河東聞喜縣東北有董池陂旣盡也

御以蒲菽儀禮既夕禮記宣十二年杜注云菽好箭蒲楊柳可以

爲箭以此而言蒲非直得策馬亦爲矢幹也又陸璣疏云

蒲柳有兩種皮正青者曰小楊其一種皮紅者曰大楊其

葉皆長廣於柳葉皆可以爲箭幹故春秋傳曰董澤之蒲

可勝既乎今又以爲箕罐之楊也詩王風揚之水正義古矢筈之材

有竹有木竹二揚之篠荆之筈籥也木二荆之楛冀之蒲

也左傳曰董澤之蒲是蒲柳亦中矢筈禹時在甸服故無

貢禹貢錐指七今山西絳州聞喜縣東北三十五里有董氏陂

中產楊柳可以爲箭又名參龍池卽舜封董氏參龍之所

大事表案儀禮鄭注云蒲菽牡蒲莖直以爲楊柳者非

也宋葉隆禮契丹國志二十七云西樓有蒲瀕水叢生一

幹葉如桺長不盈尋丈用以作箭不矯揉而堅卽此類也射連尹襄老襄十五年正義服虔云連尹射官言射相連屬也云云

連尹楚官名

國語晉語七注

案史記淮陰侯傳楚官名有連敖

蓋卽連尹之遺制

楚師軍於邲解邲鄭地

邲河雍地也

淮南人間訓注

楚軍於邲音卞京相璠曰在敖北

水經

濟水

一注今河南開封府鄭州東六里有邲城亦爲邲水卽今

之汴河濟水于此又兼名邲卽晉楚戰處明季爲河所奪

今湮

大事表上

邲水一名汴水楚漢時謂之鴻溝三國時謂

之官渡

大事表九

餘詳古音



亦終夜有聲解言其兵衆將不能用

言其軍踞無復部伍

顧氏補正中

丙辰楚重至於邲解重輜重也正義輜重載器物糧食常在軍後故乙卯日戰丙辰始至於邲也

詩曰我任我輦左傳曰秦堇父輦重如役皆輜輦也兵法曰無輜重則亡官渡之戰魏武用許攸之計焚袁紹之輜重而敗之則輜重大在所慎也故輦以人

禮書百三十九

晉楚軍

制惟此一戰所載甚詳晉出師時爲三軍荀林父將中軍士會將上軍趙朔將下軍後來賞鞏之功方分爲六軍然此時雖未分六軍之名已有六軍部分何故當晉師臨河自隨武子以下皆不欲進惟彘子以中軍佐濟若止是三

軍時中軍將自是林父彘子安能分軍先濟所以韓獻子曰彘子以偏師陷是則六軍部分已分晉固如是當時楚之軍制尤詳楚亦有三軍如子重左子反右所謂三軍是正軍時孫叔敖爲令尹秉國之政不在三軍之數是統三軍者且如南轅反旆其或進或退號令皆由令尹其君之戎分爲二廣內官序當其夜是親軍亦不在三軍之數常隨禁軍者到得率游闕四十乘從唐侯游闕自是楚兵亦不是親兵亦不是正軍往來補闕者看甚處薄則從而補之此所謂奇軍奇軍便是正軍中旋分出不是正軍之外別有奇軍但不係步伍之數者楚旣敗晉以乙卯日敗丙辰楚重方至以此知輔軍常後正軍一日到蓋楚之軍甚

有法輜重不過正軍一日若與正軍大過相遠時便有邀擊之患大過近時重兵才亂便亂了正軍後世用兵先擊輜重取勝者甚多只緣不是太近則太遠然楚之軍制不特如此所謂軍行右轅左追蓐前茅慮無中權後勁此尤詳備軍行時敵在右則持轅以備敵在左尋水草爲宿之備軍若宿後旋求水草則亦有邀擊之患惟軍正行時右則持轅左則尋草頓兵相接截然整齊所謂前茅今之達白之類前茅旗名或遇山險或遇敵前舉旗則後面可以爲備中權是中軍大將軍進退之權三軍之心在此所謂後勁楚精兵在後大抵後來勁兵多在前多被人擊敗惟精兵在後可以爲前之備百官象物而動物是旗如周禮

公卿建旛大夫士建物隨旗所向看舉甚處公卿都隨此是師之耳目其晝如此夜又甚嚴何故舉親兵論之可見右廣初駕數及日中左則受之以至于昏內官序當其夜今之所謂當更如此則敵人掩襲不得楚軍制如此之詳安得不取勝又戰亦有法當時楚旣陳晉未成列孫叔敖三軍皆進楚王在中間中軍與晉中軍相對臨戰時又分左右拒右拒當晉下軍左拒當晉上軍兩陳相對及戰時晉中下軍皆望風而走至於爭舟惟上軍未動時左拒正對上軍之整恐左拒獨當不得楚子使潘黨以四十乘從唐侯爲左拒以從上軍何故添游闕四十乘又添唐侯一軍只緣中下軍皆散惟上軍未動若見添生軍時也退上

軍見他添生軍多所以說楚師方壯緣此三軍都走此又

楚戰之法

呂氏春秋左氏傳說六

而收晉尸以爲京觀解積尸封土其上謂之京觀

師古曰京高丘也觀謂如闕形也

漢書翟方進傳注

祀于河作先君宮告成事而還

今河南懷慶府原武縣西北大河卽晉師敗而濟河楚莊

王祀河告成處

大事表八上

鄭殺僕叔及子服解子服石制也

石制字子服制製古字通襄公三十一年左傳子有美錦

不使人學製焉定公九年哲憤而衣狸製哀公二十七年

成子衣製杖戈說苑復恩篇甯文子具紵絺三百製史記

叔孫通傳服短衣楚製然則製乃衣服之通稱也周秦名  
字解故

文公猶有憂色

伯兄曜北曰說苑云楚有子玉得臣文公爲之側席而坐尊  
賢卽本此曲禮所謂有憂者側席而坐是也

困獸猶鬪

汪繼祖曰淮南齊俗訓云獸窮則羣卽是此義家語顏回  
公篇俱作獸窮則羣韓  
詩外傳二作獸窮則羣

宋華椒

閱見襄  
九年子椒春秋分記  
世譜三

蕭人囚熊相宜僚

熊相氏芊姓英賢傳楚熊相宜僚之後懷王時將軍熊相

祁通志氏族略五案哀十六年有熊宜僚彼以熊為氏此熊相

是氏特名同爾昭廿五年熊相禡即其後

申公巫臣

巫臣氏芊姓楚屈蕩之子屈巫也亦曰申公巫臣奔晉通志

氏族略四案屈巫即巫臣見成二年巫字子靈見襄廿六年

程氏世譜七云屈申之後曰申公巫臣考屈申見昭四年

何得謂巫臣是其後況申公乃縣公之稱屈申其名也強

相牽合殊不足據

有山鞠窮乎釋文鞠起弓反解鞠窮所以禦溼欲使無社逃

泥水中

臣錯案藟卽江蘿根也又名蘼蕪又名薇蕪其根名芎藭  
臣錯案本艸療頭痛寒痺諸寒冷氣腹痛故司馬卯曰有  
山芎藭乎欲使逃泥水中故問有禦寒及腹痛之藥也

說文

營字  
繫傳

河魚腹疾奈何

正義如似河中之魚云云

汪瑜曰孔疏殊未明晰河魚腹疾言如河魚之腹大也內  
經本神篇云脾氣實則腹脹故以芎藭升清散鬱麥麴化  
水銷滯

目於智井而拯之

釋文智井廢井也字林云井無水也

臣錯案左傳曰目於智井蓋爲隱語也言井無水若目無

精也

說文  
智字繫傳



同盟于清丘解衛地在今濮陽縣東南

今直隸開州案州屬大名府東南七十里有清丘高五丈唐置清

丘驛五代唐同光初李紹興敗梁遊兵于清丘驛南即此

春秋地名攷略七

宣十復室其子

世本曰莊叔達生得閭叔穀詳文元年其子謂得閭叔穀也惠氏

補注

使子張解子張穆公孫

公孫黑肱字子張亦曰伯張襄廿二子印子成十三高氏左傳姓名同異

一攷

楚子使申舟聘于齊曰無假道于宋亦使公子馮聘于晉不

假道于鄭

楚子忿晉伐鄭欲伐宋而無名故不假道以啟怨其聘于

晉非爲好也以怠晉之救宋而已

趙氏補注五

華元曰過我而不假道鄙我也鄙我亡也解以我比其邊鄙是與亡國同

攷呂氏春秋說此事云往不假道來不假道是以宋爲野鄙也高誘注欲以宋爲鄙邑與杜說同貞山以爲當作鄙薄之意昭十六年傳夫猶鄙我注云鄙賤是也尚書反鄙我周邦愚謂此當從杜無疑下云亡也可見陸多引他書爲證而意自不同亦好異之過也

傅氏驚誤上

案昭十九年

傳是晉之縣鄙也何國之爲語意正同杜氏不獨本呂覽

行論篇之注也

楚子聞之投袂而起屨及於寤皇劔及於寢門之外車及於蒲胥之市

寢門之外遠於寤皇蒲胥之市遠於寢門之外屨人進屨追及於寤皇前此未及屨也劔人進劔追及於寢門之外前此未及劔也車人駕車追及於蒲胥之市前此未及車也蓋興師之速如此

邵氏左觴

見晏桓子解桓子晏嬰父十七年解晏弱桓子

晏氏齊邑或云齊公族

通志氏族略三

晏城山東濟南府齊河縣

北二十五里志云齊晏嬰采邑也今縣治南有晏城馬驛

蓋以此城名

讀史方輿紀要三十一

案晏以邑爲氏世系無攷晏

子春秋六云景公有變女請嫁于晏子若是公族景公不當婚同姓晏子不僅以不負託辭已

宣十 樂嬰齊

嬰齊戴公五世孫

春秋分記世譜三

伯宗曰解伯宗晉大夫

伯宗晉大夫孫伯糾之子

國語晉語五注

宗氏出自子姓宋襄公

母弟敖仕晉孫伯宗為三卿所殺

唐書宰相世系表四上

高下在心解度時制宜

服虔曰高下猶屈中也

見太平御覽人事部百三十六惠氏補注二

瑾瑜匿瑕解匿亦藏也雖美玉之質亦或居藏瑕穢

瑕玉之病也

禮記聘義注

呂諤字林云瑕玉小赤而云病者以

瑕與疵瑕義同

又正義

臣錯案左傳曰瑾瑜匿瑕謂美玉瑕

不足以害之也

說文瑾字繫傳

國君含垢解忍垢恥

受國之垢是謂社稷主

老子道德經任信章

師古曰人君之善御下

亦當忍恥病也

漢書路溫舒傳注

後漢書梁節王暢傳今陛下爲

臣收污天下收污猶左氏傳所謂國君含垢

日知錄二十七

登諸樓車解車上望櫓

服虔曰樓車所以窺望敵軍兵法所謂雲梯也

史記穽世家集解

案五宗世家集解應劭曰樓車所以窺看敵國營壘之虛實也

詩曰臨衝閑閑毛氏曰臨

車衝車也蓋臨車高衝車大高則可以臨下大則可以突

前故兵書有作臨車衝車之法楚子使解揚登樓車以告

宋人蓋臨車之類

禮書百三十八

臣之祿也

祿猶言生也謂雖死猶生也

梁氏儀禮經傳通解十二補注

使華元夜入楚師登子反之牀起之曰寡君使元以病告解  
兵法因其鄉人而用之必先知其守將左右謁者門者舍人  
之姓名因而利道之華元蓋用此術得以自通

此注皆見孫子用閒篇曹公孫子注曰因敵鄉人知敵表  
裏虛實之情故就而用之可使伺候也守謂有官守職任  
者謁告也主告事者也門者守門者也舍人守舍之人也  
必先知之爲新舊有急則呼之則不見呵止亦因此知敵  
之情

見通典兵四及太平御覽兵部二十三

惠氏補注二

華元登牀乘其不虞劫

之與盟也

顧氏補正中

析骸以爨解爨也

師古曰言無薪樵示困之甚也

漢書五行志下之下注

潞子解潞赤狄之別種子齊也

潞赤狄隗姓

國語鄭語注世族諸同

今山西潞安府潞城縣

大事表五潞

有二宣十五年潞子赤狄之潞也哀八年鮑子及潞齊邑

也

春秋分記蠶理書十一

而奪黎氏地解黎氏黎侯國上黨壺關縣有黎亭

黎子姓國侯齊一作邕邾文王所戡者

路史國名紀四

黎氏字亦

作犁風俗通云九黎之後

通志氏族略二

今潞安府治長治縣西

三十里黎侯亭是也又山東曹州府范縣有黎城則黎侯

失國寓衛時所居之地

大事表七之三

案有謂黎侯地爲潞氏

所奪出寄于衛邾風式微之詩由此而作非也旄丘詩序正義曰此詩之作責衛宣公宣公以魯桓二年卒至魯宣十五年百有餘歲卽此時雖爲狄所逐後更復其國至宣公之世乃赤狄奪其地耳與此不同此唯言狄人迫逐不必是赤狄也據此則彼黎侯乃此黎侯之先世不得合爲一事

虐我伯姬

上云酈舒爲政而殺之王符引作虐此以虐爲殺也

惠氏補注

二

詳攷異

故文反正爲乏

解文字

正義

服虔云言人反正者皆乏絕之



道也人反德則妖災生妖災生則國滅亡是乏絕之道也

正面北乏面南故文反正爲乏侯各有獲獲各有容故王

三侯三獲三容諸侯二侯二獲二容卿大夫士一侯一獲

一容

見周禮夏官射人

容革爲之鄉射參侯道居侯黨之一西五

步

見儀禮鄉射禮

大射西十北十謂之乏

見大射儀

乏以矢力乏於此

也謂之容以獲者所屏也爾雅曰容謂之防郭璞曰如小

曲屏風唱射者所以自防隱容與防皆乏之異名也

禮書一百

十正乃射侯之正

征音

象其形焉正以受矢乏以藏矢是相

反也反正爲乏其義在此或曰反正爲𠂔

音

𠂔藏矢短牆

也正以受矢𠂔以蔽矢是相反也此亦反正爲乏之義

禮書

光說文長箋云𠂔从正反體會意一說𠂔以蔽矢亦从正反變體但形稍不類未知其可

通志六書略五

左氏假文字以見義特一時旨趣所寄未必皆出本人之語有取形者如止戈爲武皿蟲爲蠱亥有二首六身之類是也有取聲者如姑吉人歸不歸之類是也周禮係氏之教猶可想見許叔重謂春秋傳皆以古文厥意可得而說卽指此類而鄭夾漈猶詆左氏不達六書之義亦誕且妄矣

晉荀林父敗赤狄于曲梁解曲梁今廣平曲梁縣也

襄三年晉侯之弟揚干亂行於曲梁卽此故城在今直隸

廣平府治永年縣東北

大事表七之三

殺召戴公

戴公桓公弟案戴公與桓公同時爲周卿士召桓公見宣六年宰

周公亦與周公忌父同時注疏不詳其系今從陳氏譜以爲兄弟亦未見其必然也

大事表十二上

餘見僖九年肥解

### 秦桓公

秦伯稻薨子榮嗣

胡宏皇王大紀四十七

秦伯榮薨諡曰桓公

皇王大紀

五十一

案秦伯之名史傳失載甚多蓋不盡以其名通也

康公名罃桓公是其孫何得不避嫌名耶五峯之說未可案據又案文六年傳秦伯任好卒杜云任好秦穆公名春秋不書其卒故何休于公羊文十八年秦伯罃卒經下注云秦穆公也以罃爲穆公名謬甚僖十五年秦穆姬與太子罃登臺履薪正當穆公之時杜云罃康公名史記亦同左氏的然可據況秦穆號列五霸其名當必不誣休尚未

信而顧以其子之名實之耶或曰何注穆字當爲康轉寫之譌惜釋文與作疏者隨文爲說不一舉正耳

次于輔氏解晉地

襄十一年秦伐晉濟自輔氏卽此今朝邑縣案縣屬陝西

北十三里有輔氏城春秋地名攷略四案晉知果一作別族爲

輔氏晉語九戰國趙策一疑取邑爲氏

晉侯治兵于稷以略狄土解略取也稷晉地河東聞喜縣西

有稷山

今山西絳州稷山縣南五十里有稷神山山下有稷亭卽

晉侯治兵處也大事表七之三

及雒解晉地

晉地有上雒見哀四年傳案紀年云晉烈公三年楚人伐我南鄙至于上洛則上雒在晉南可知赤狄近晉東界今略土而還疑此雒在其東有雒地故彼加上以別之郡國志言上雒雒水所出則此雒當亦以水得名高岱春秋地名附攷疾病則亂吾從其治也

魏顓父病困命使殺妾以殉又晉趙孟魯孟孝伯並將死其語倫襄卅一又晉程鄭問降階之道鄭然明以將死而有

惑疾

襄廿四

此等並是將死之時其言皆變常而論語曾子

曰人之將死其言也善但人之疾患有深有淺淺則神正深則神亂故魏顓父初欲嫁妾是其神正之時曾子云其言也善是其未困之日且曾子賢人至困猶善其中庸已

下未有疾病天奪之魂魄

案論語疏引此無魂字

苟欲偷生則趙孟

孝伯程鄭之徒不足怪也

禮記檀弓下正義

凡人病未昏酒未醉

皆曰治列子

楊朱篇

鄧析謂子產曰子奚不時其治也謂伺

其醒時

顧氏補正中

杜回躓而顛

躓謂行倒蹶也

禮記中庸正義

亦賞士伯以瓜衍之縣

今山西孝義縣北有瓜城

案縣屬汾州府日講春秋解義三十

天奪之魄矣

解心之精爽是謂魂魄

耳目有聰明謂之魄

大戴禮記少閒篇盧辯注

初稅畝非禮也穀出不過藉以豐財也

解公田之法十取其

一今又履其餘畝復十收其一故哀公曰二吾猶不足遂以爲常故曰初周法民耕百畝公田十畝借民力而治之稅不過此

穀梁傳曰去公田而履畝十取一也蓋古者八家同井中爲公田藉而不稅今去公田則九家同井而每畝稅取其什之一近貢法也或以爲什二而稅非也論語言二者是哀公用田賦以後耳

孔廣森公羊春秋經傳通義六

魯語曰有軍旅之出

則徵之無則已其歲收田一井出稷禾秉芻缶米不是過也古者公田藉而不稅有武事然後取其賦今魯用田賦者是無軍旅之歲亦一切取之厲民甚矣稅畝本無其制故言初田賦本有其制特不宜非時用之故言用

公羊春秋經傳

通義

十一

宣十 減赤狄甲氏及畱吁鐸辰解鐸辰不書畱吁之屬

甲氏在今直隸廣平府雞澤縣境畱吁今山西潞安府屯

畱縣東南十里純畱城是鐸辰在潞安府境

大事表五

成周宣榭火解成周洛陽宣榭講武屋別在洛陽者爾雅曰

無室曰榭謂屋歇前正義名之曰宣則其義未聞服虔云宣

揚威武之處義或當然也公羊以爲宣宮之榭謂宣王之廟

也以其中興其廟不毀與左氏異也

宣王中興嘗講武於東都於是乎有榭焉後王思其功因

以爲宮而祀之樂器藏焉本二傳漢書五行志從之非廟制也故不曰

宮而曰榭云邵寶春秋簡端錄案漢志云宣其名也服氏本之



爲義胡傳引呂大臨攷古圖有邠敦者稱王格于宣榭以證是宣王之廟其制如榭愚謂不竟云廟而猶稱榭者其與廟異制可知邵二泉之說爲勝

凡火人火曰火天火曰災

正義

人火從人而起云云

人火因人而興故指火體而爲稱天火不知何起直以所

災言之其名雖殊爲害不別

舊唐書禮儀志二

王聞之召武子曰季氏而弗聞乎解季其字

天子字諸侯僅見書文侯之命覲禮則伯父伯舅叔父叔舅之恒稱無稱其二十字者降而字陪臣惟春秋中葉後有之宣十六年王於士會曰季氏成二年王於鞏朔曰伯昭十五年王於荀躒曰伯氏籍談曰叔氏竟稱其五十字

較之僖十二年王謂管仲舅氏杜注伯舅之使故曰舅氏

者已少不同豈非世降變禮之一端乎

尚書古文疏證四

王享有體薦宴有折俎解享則半解其體而薦之所以示其儉體解節折升之於俎物皆可食所以示慈惠也

享有體薦謂全取一體若膊若脾以進大享也宴有折俎

謂解其骨肉使可食也嘉宴也

說文有字繫傳

宣十七年六月癸卯日有食之解不書朔官失之

己巳歲

姜氏云六月甲辰朔不應食大衍云是年五月在交限六

月甲辰朔交分已過食限蓋誤今歷推之是歲五月乙亥

朔入食限六月甲辰朔泛交二日已過食限大衍爲是

案

氏歷書三云姜爰謂其誤者五此其三也乙亥日食黃道胃十三度少

元史歷志二

會于斷道討貳也盟于卷楚解斷道晉地卷楚卽斷道

今山西沁州東有斷梁城大事表七之三

晉人執晏弱于野王解野王縣今屬河內

野王今河南懷慶府河內縣治春秋輿圖

苗賁皇使解賁皇楚鬬椒之子楚滅鬬氏而奔晉食邑于苗

地

苗在懷慶府濟源縣南十五里春秋輿圖

晉師還

晉未嘗出師而云晉師還者豈斷道討貳之師與惠氏補注二

范武子解初受隨故曰隨武子後更受范復爲范武子

今山東曹州府范縣東三里有士會墓季氏私攷疑濮州

衛地晉不應以封其大夫愚攷狄嘗滅衛衛之遺壤入于狄者甚多至宣十五年晉滅狄而士會于十二年傳稱隨武子于十七年請老稱范武子以後終春秋之世稱范不稱隨蓋士會以十六年與於滅狄之功滅畱吁甲氏晉得狄土以爲士會賞邑耳其後范復入齊孟子自范之齊卽此蓋春秋之季范氏叛晉卽齊齊衛助之而范遂入齊爲邑其地之去來固甚明也

大事表七之三

宣十八楚於是乎有蜀之役解在成二年冬蜀魯地泰山博縣西北有蜀亭

今山東汶上縣西南四十里有蜀山其下有蜀山湖

案縣屬兗

州府今俗呼蜀山湖

與南旺湖東西相對

案大事表云爲秦安府接境春秋地名攷略二

逐逐東門氏

王樵曰行父始與襄仲同謀以成宣公之篡後因歸父欲去三桓又假殺適立庶之說以逐東門氏季氏不臣之迹於此見之矣臧孫許身為司寇陽怒而不力爭反代為逐之謂非季孫私黨吾不信也

讀左日鈔五

袒括髮解以麻約髮

士喪禮曰主人髻髮袒鄭注云古文髻作括是括為古文

髻也

惠氏補注二

補釋十二